



Na osnovu člana 90. Zakona o javnim nabavkama Bosne i Hercegovine („Službeni glasnik BiH“ broj: 39/14), a u skladu sa modelom Pravilnika o postupku direktnog sporazuma Agencije za javne nabavke Bosne i Hercegovine ("Službeni glasnik BiH", broj 90/14), Ministarstvo finansija Kantona Sarajevo d o n o s i

## **PRAVILNIK O POSTUPKU DIREKTOG SPORAZUMA**

### **Član 1.**

#### **(Predmet Pravilnika)**

(1) Ovim se Pravilnikom definiše postupak javne nabavke roba, usluga i radova putem direktnog sporazuma iz člana 90. Zakona o javnim nabavkama (u daljnjem tekstu: Zakon).

### **Član 2.**

#### **(Uslovi za primjenu direktnog sporazuma)**

- (1) Postupak direktnog sporazuma se može provesti kada je procijenjena vrijednost istovrsnih roba, usluga ili radova na godišnjem nivou jednaka ili manja od 6.000,00KM.
- (2) Ministarstvo finansija može tokom jedne godine za isti predmet nabavke potrošiti do 6.000,00KM putem ovog postupka.
- (3) Ministarstvo finansija može započeti postupak direktnog sporazuma ako je takva nabavka predviđena planom nabavki ili kada ugovorni organ donese posebnu odluku o pokretanju direktnog sporazuma u skladu s članom 17. stav (1) Zakona.

### **Član 3.**

#### **(Principi dodjele direktnog sporazuma)**

Postupak direktnog sporazuma se provodi na način da se osigura poštovanje principa iz člana 3. Zakona, tako da je Ministarstvo finansija dužno da postupa transparentno, da se u postupku javne nabavke prema kandidatima/ponuđačima ponaša jednako i nediskriminirajuće, na način da osigura pravičnu i aktivnu konkurenciju, s ciljem najefikasnijeg korištenja javnih sredstava u vezi s predmetom nabavke i njegovom svrhom.

### **Član 4.**

#### **(Početak postupka)**

- (1) Procjenjivanje vrijednosti javne nabavke koja se dodjeljuje direktnim sporazumom vrši se u skladu s članom 15. Zakona.
- (2) Procijenjena vrijednost mora biti važeća u trenutku kada ugovorni organ zatraži prijedlog cijene ili ponudu od jednog ili više privrednih subjekata.
- (3) Postupak direktnog sporazuma započinje donošenjem odluke ili rješenja u pisanom obliku koje obavezno sadrži:
  - a) zakonski osnov za provođenje postupka javne nabavke,
  - b) predmet javne nabavke,
  - c) procijenjenu vrijednost javne nabavke,
  - d) podatke o izvoru – načinu finansiranja,
  - e) vrstu postupka javne nabavke.





### Član 5.

#### (Izvršenje postupka)

- (1) Ministarstvo finansija ispituje tržište te traži pisani prijedlog cijene ili ponudu od jednog ili više privrednih subjekata koji obavljaju djelatnost koja je predmet javne nabavke.
- (2) Nakon što primi prijedlog cijene ili ponudu od jednog ili više ponuđača, a prije zaključivanja direktnog sporazuma, Ministarstvo finansija:
- pregovara sa ponuđačem/ponuđačima o cijeni i/ili
  - prihvata prijedlog cijene ili ponudu jednog ponuđača i/ili
  - provodi drugu vrstu postupka definisanu Zakonom.

### Član 6.

#### (Izbor ponuđača)

- (1) Kod izbora ponude na osnovu koje će biti dodijeljen ugovor, Ministarstvo finansija treba uzeti u obzir faktore kao što su cijena, količina, kvalitet, tehnički opis, estetske i funkcionalne zahtjeve, karakteristike koje se odnose na okolinu, vrijeme i period isporuke i sl.
- (2) Ministarstvo finansija bira ponuđača na način koji garantira najbolju razmjenu vrijednosti za novac. Kada vodi pregovore koji se odnose na prijedlog cijene ili ponudu, ugovorni organ djeluje u skladu sa dobrom komercijalnom praksom.
- (3) Kada traži prijedlog cijene ili ponudu, Ministarstvo finansija daje ponuđačima određeni rok da pripreme prijedlog cijene ili ponudu, uzimajući u obzir kompleksnost nabave.

### Član 7.

#### (Zaključivanje direktnog sporazuma)

Direktni sporazum smatra se zaključenim:

- Kod nabavki čija vrijednost iznosi do 1.000,00 KM, prilaganjem računa ili druge odgovarajuće dokumentacije;
- Kod nabavki čija vrijednost je viša od 1.000,00 KM, Ministarstvo finansija je dužno zaključiti ugovor.

### Član 8.

#### (Stupanje na snagu)

Ovaj Pravilnik stupa na snagu danom donošenja, a objaviće se na web stranici Ministarstva finansija Kantona Sarajevo.

Stupanjem na snagu ovog pravilnika, prestaje da važi Interni pravilnik o nabavci roba, vršenju usluga i ustupanju radova kroz postupak direktnog sporazuma Ministarstva finansija Kantona Sarajevo, broj: 08-01-14-4912/06 od 21. 02. 2006. godine i 08-01-14-4912/06 od 20. 10. 2008. godine.

Broj: 08-01-14-17892/15  
Sarajevo, 12. 06. 2015.



MINISTAR  
*Halebić*  
Prof. dr. Jasmin Halebić



web: <http://mf.ks.gov.ba>  
e-mail: [mf@mf.ks.gov.ba](mailto:mf@mf.ks.gov.ba)  
Tel: + 387 (0) 33 565-005, Cent. + 387 (0) 33 565-000  
Fax: + 387 (0) 33 565-052 i 565-048  
Sarajevo, Maršala Tita 62

